

Niev intent per la casa da scola a Rueras

La casa da scola a Rueras duei daventar ina casa da giugs e divertiment per affons e giuvenils. Sco quei ch'il president communal *Martin Cavegn* ha detg sin damonda dalla FMR ei il concept persuerter elavuraus. La sonda vargada hagi el menau ina discussiun cun representants dall'uniun da giuventetgna. Ils resuns da lezza vart seigien positivs. Previu ei da nezegiar las stanzas per differentes giugs e divertiment. Medemamein duei vegnir endrizzau ina stanza da kino. La Casa Soldanella che nezegia leu localitads duei saver far diever vinavon da quellas. La finamira ei da metter en funcziun la casa da giugs silla stad 2022. La casa da scola a Rueras ei vegnida baghegiada igl onn 1959.

Casa da scola duei daventar casa da giugs

La vischnaunca da Tujetsch vul dar in niev intent alla casa da scola a Rueras. Las differentas localitads duein survir igl avegnir pil divertiment dils affons e giuvenils. Il concept persuerter ei sin meisa. La Casa Soldanella duei saver far diever vinavon da localitads.

Hans Huonder/FMR

La casa da scola el vitg da Rueras ei vegnida baghegiada igl onn 1959. Lu haveva Rueras aunc biars affons e consequentamein era scolars. 1997, 1999 e 2002 eis ella vegnida renovada. Ella ha ina surfatscha da localitads da totalmein 2800 meters quadrat. 2007 ha la vischnaunca da Tujetsch decidiu da serrar la casa pil menaschi da scola e da centralisar l'entira scola a Sedrun. Dapi lu ei il diever dalla casa staus pliras ga en discussiun. Avon diesch onns eis ei schizun stau tema da vender la casa, la fin finala ei quei pass lu tonaton buca vegnius fatgs. La casa ha denton era surviu sco camp da gruppas ed ei adina puspei era vegnida nezegiada d'uniuns e societads dil vitg. Ussa vegn priu ina nov'iniziativa da procurar per veta ella casa ed aschia da dar in senn a quella.

Ina societad da menaschi

Riana Deragisch che ha absolviu igl emprendissadi mercantil tier l'administraziun communal ha elavurau in concept pil diever futur dalla casa da scola a Rueras. Ella duei esser igl avegnir in liug da divertiment e giug. «Quei concept hai jeu discutau culla giuventetgna la sonda vargada, ils resuns ein stai positivs. Ils giuvenils discuteschan ussa il concept e lu lein nus empruar da far guotas cun tgau. Riana Deragisch vegn ad accumpignar la realisaziun dil concept», di il president communal *Martin Cavegn* sin damonda dalla FMR. La casa da scola duei star vinavon en possess dalla vischnaunca da Tujetsch. «L'idea ei da fundar in'uniun – per exempel era cun commembers dalla giuventetgna - e quella duei lu fundar sezza ina societad da menaschi per la casa. Lezza affittass lu la casa dalla vischnaunca e pagass persuerter in tscheins», declara *Martin Cavegn*. Las entradas pil diever dalla purschida flessegiassen lu secapescha ella cassa dalla societad.

Differents elements da divertiment

Il concept per la casa da scola a Rueras preveda da nezegiar las localitads sin differenta moda a maniera. Aschia duei ei dar in local d'aventuras, la sala da gimnastica duei vegnir nezegiada per exempel sco arena da giugs. Ei duei vegnir endrizzau ina cuntrada culla tgina dil Rein e differents baghetgs. Mintg'ina duei esser era pedagogicamein aschia ch'ella plidenta affons da differentas vegliadetgnas. Pusseivladads da reiver e semuentar duein cumpletar quella purschida. All'entrada ella casa duei ei dar aschidadir ina recepziun cun pusseivladads da magliar ni beiber enzatgei. Medemamein duei vegnir installau pusseivladads da divertiment ordaviert. Ina sala duei survir sco cinema, in'otra era per zambergiar ni giugs. «Nus patertgein era vid ina canorta per affons pigns. En quei connex vegn ei denton ad esser necessari da sclarir ils basegns», di Martin Cavegn. Ina stanza duei star vinavon a disposiziun pil diever dalla Casa Soldanella.

Semtgau en in onn

Interessentas ed interessents dalla purschida ston pagar in'entrada per aschia cuvierer ils cuosts da menaschi. Medemamein duein ils affons esser surveglai dils geniturs. Las investiziuns ell'infrastructura fagess la vischnaunca. «Nus quintein cun investiziuns da rodund 200 000 francs», di Martin Cavegn. Tenor el duess quella purschida nova era scaffir entginas plazzas da lavur. La finamira ei da realisar ton pli spert l'infrastructura en casa da scola a Rueras sco era da scaffir la basa pil menaschi, pia la fundaziun dall'uniun e dalla societad da menaschi: «Sche tut va bein duess la purschida star a disposiziun silla stad vegnenta. Nus vesin quella sco cumpletaziun dalla purschida existenta, surtut era sco alternativa per dis cun schliat'aura.» L'idea fundamentala seigi da nezegiar prudentamein las localitads avon maun. Il mument cuostien ellas sulettamein alla vischnaunca.